

李文忠公奏稿

李文忠公奏稿

卷之三十五目錄

晉賑捐運請獎摺

光緒五年八月初一日

東明加築月隄摺

光緒五年八月初一日

請賞德國提督寶星片

光緒五年八月初一日

楊向氏請匾額片

光緒五年八月初一日

兵差報銷章程摺

光緒五年八月初一日
附清單

蘆鹽加耗展限摺

光緒五年八月初一日

請提湖北新酒摺

光緒五年九月初二日

奏調劉盛藻片

光緒五年九月初二日

吳可讀建專祠片

光緒五年九月二十四日

籌議交收伊犁事宜摺

光緒五年十月初二日

賑糧酌量分撥摺

光緒五年十月初二日

驗收續購船礮摺

光緒五年十月十六日

奏留丁汝昌片

光緒五年十月十六日

孝子薛有信請旌片

光緒五年十月十六日

張家口建書院片

光緒五年十月十六日

籌議購船選將摺

光緒五年十月二十八日

請催海防經費片

光緒五年十月二十八日

武弁回華教練摺

光緒五年十月二十八日

德國兵官請給寶星片

光緒五年十月二十八日

東明月隄工費摺

光緒五年十月二十八日

蘆引推展摺

光緒五年十一月十五日

湖北京餉衝失摺

光緒五年十一月十五日

議覆中外洋務條陳摺

光緒五年十一月二十六日

南紳會辦工撫片

光緒五年十二月十九日

李文忠公奏稿卷三十五

全集一之三十五

桐城吳汝綸編錄

晉賑捐題請獎摺

光緒五年八月初一日

奏爲遵保直隸歷辦晉賑捐運事宜尤爲出力人員照章酌擬獎敘恭摺仰祈

聖鑒事竊山西前兩年大旱爲災賑需旣多不給運道又甚艱遠必須廣勸捐輸設法轉運以救民命臣鴻章奉

諭兼籌當以天津爲總匯要區奏派司道大員設局綜理另派員於直屬保定及江浙東奉等省分設捐局勸辦合之前福建撫臣丁日昌經辦湖州等處賑捐道員唐眞銓經辦兩湖賑捐統歸津局核獎又派員航海赴南省奉省采辦米糧運晉賑糶凡收捐銀米采辦糧石並奉撥江浙江廣漕米以及東南各省捐協各款均

源源運交津局接收又派員於直屬之獲鹿保定泊頭鄭家口白塔寺呂漢鎮馬廠設轉運局自津河分運米糧至保定等處換車統赴獲鹿達晉是爲北路又於直屬蘇曹鎮山東館陶縣設轉運局由南運河赴館陶換車至蘇曹易駝入東陽關達晉是爲中路又由南運河至河南道口附近登陸赴清化鎮等處達晉是爲南路其棉衣藥物則分路搭運銀兩則由北路逕解山西省城而河南捐運事宜亦歸併辦理此直省籌辦鄰賑之大略情形也近年捐務已成弩末各省又有水旱災傷加以滇黔川局林立勸辦本非易事各委員以鄰災至重飢黎待哺嗷嗷實力實心多方勸勉寒暑無閒疾疫不辭捐生感其至誠因而聞風興起除丁日昌唐興銓經手捐款不計外統共集捐實銀至三百餘萬之多獎案亦剋期辦畢其自南省奉省運解銀米至津及由津轉運各員涉歷

重洋頻經危險遇河凍則擊冰前進遇山險則負戴以行夏秋暑雨交侵農忙車駝難負尤能不避艱阻竭力經營統計運解米糧四十餘萬石銀三百數十萬兩且辦捐者兼籌轉運轉運者並勸捐輸時閱兩年始終不懈全活災民奚止百萬此各員出力之大概情形也自來地方災荒鄰省委員能不分畛域苦口勸捐遠道轉運集成銀米如此之鉅殊不多覲實爲臣等始願所不及足見該員等誼切救災勇於爲善洵堪嘉尙其勞績迥非尋常可比自應欽遵疊奉

諭旨查照河工海運章程請獎查直隸總分各局事極繁重歷時又久出力人員本多今將稍次者一律刪減擇尤酌擬獎敘開單恭呈

御覽仰懇

天恩俯准照擬給獎以昭激勵其武弁應給五六品銜頂及千把
外委者月咨兵部註冊謹合詞恭摺具

奏伏乞

皇太后

皇上聖鑒訓示謹

奏

東明加築月隄摺

光緒五年八月初一日

奏爲黃水偏刷東明隄根現於隄裏加築月隄以資防守恭摺仰祈

聖鑒事竊直隸東明縣地面新築黃河南隄六十餘里每年飭調大名開州練軍派開州協副將就近督帶防汛惟黃流日向南趨河灘疊有塌陷溜勢灣進逼近隄根其與山東荷澤縣毘連之黃莊岳辛莊一段尤爲危險六月底該段隄根距水尙百餘丈旬日間又塌去數十丈坐灣處大溜僅距隄三十餘丈疊經設法搶堵乃水勢湧猛異常護隄椿料悉被衝去自來黃性湍悍不受約束必須寬留中洪資其蕩漾前因東省北岸臨河築隄佔礙水道南岸地勢低下遂更側注直衝今年黃水較大秋汛正旺誠恐隄身續塌倉卒難於收拾亟宜預籌布置據大名鎮總兵徐道奎大順

廣道黃槐森親往會同開州協副將張桂芳察勘商酌應將該段隄裏圈築月隄一道計長一千二百五十八丈頂寬二丈底寬七丈高一丈仍責令員弁固守原隄竭力搶護儻衝塌過甚萬難抵禦則兼守月隄以免他虞撙節估計約需土方工價銀九千餘兩直省庫儲極絀但事關大局不得不竭力勻籌已飭練餉局於江南協餉項下撥給銀五千兩天津釐捐項下撥給銀四千兩卽令該鎮道等核實支用遵照歷次奏案就款開除免造銷冊據報於八月二十四日興工調集練軍添雇民夫趕緊協力堅築剋期竣事將來察酌情形再行加高培厚並飭地方官查丈壓佔民田若干照案給價請免錢糧如有損壞禾苗酌給工本以示體恤除俟秋汛後再將防守情形奏報外所有黃河險要圈築月隄緣由理合恭摺具陳伏乞

皇太后

皇上聖鑒謹

奏

請賞德國提督寶星片

光緒五年八月初一日

再據出使德國大臣並肄業監督李鳳苞咨開德國予告提督巴蘭德係駐京公使巴蘭德之兄當光緒二年選送七弁赴德肄業時該提督卽導見該國兵部海部並託斯邦道提督及伊塔營官德羅他分派教導視同子弟迄今三年鉅細畢周勤勞益著請奏賞該提督寶星以示獎勵等語查光緒三年十月德國兵官德羅他教練盡心經臣奏奉

俞旨賞給寶星欽遵在案該提督照料周妥事同一律前據李鳳苞函稱該提督亟望

恩賞寶星以爲榮寵自應由臣飭局仿造二等金寶星一顆齎交駐京使臣巴蘭德轉寄傳

旨賞給以示懷柔而資激勸除咨請總理衙門照會巴蘭德知照

外附片陳明伏乞

聖鑒訓示謹

奏

楊向氏請匾額片

光緒五年八月初一日

再前陝甘總督臣楊岳斌之父楊秀貴母楊向氏於上年直賑喫緊之際捐助實銀一千兩諭令楊岳斌匯解來直當經分撥濟賑臣查楊秀貴原任直隸獨石口副將現年九十歲楊向氏年八十一歲均受一品

誥封家非僥裕性實仁慈每以節省所餘濟人急難前因直晉豫陝四省旱荒普捐巨款助賑災黎全活甚多救災恤民之誠老而彌篤深堪嘉尚雖據稱不敢邀敘實未便壅於

上聞除濟晉之款已由山西撫臣奏蒙

賞給御書匾額外所有捐助直賑銀一千兩應請

旨准其建坊給予樂善好施字樣以示旌獎理合附片具陳伏乞

聖鑒訓示謹

奏

兵差報銷章程摺

光緒五年八月初一日

奏爲查辦各屬兵差報銷酌議章程分別奏咨立案恭摺仰祈
聖鑒事竊直隸各州縣歷年供應各處征調遣撤並本省防剿過
境官兵應需廩給口糧馬乾車價房價暨運送軍裝糧餉添設腰
搬工料等項自同治三年七月起截至同治八年十二月底止業
經分年分起造冊奏報奉部核覆准銷在案其自同治九年正月
至今又歷十年因地方連遭災歉辦理賑撫未及兼顧現在清理
新舊交代應將各屬應付兵差等項自同治九年起截至光緒四
年十二月底止接續造冊報銷以清積牘已由署藩司丁壽昌檢
查各屬送到銷冊詳細句稽分別准駁核實造報其中有應循舊
章者有應酌量變通者請先分別奏咨立案據丁壽昌分列清單
具詳前來臣覆核無異除咨戶兵工三部外所有應行奏明立案

事宜理合繕單恭摺具陳伏乞

皇太后

皇上聖鑒謹
奏

謹將查辦各屬兵差報銷酌議應行奏明立案事宜繕單恭
呈

御覽

計開

一帶兵官弁原給跟役馬匹等項應按品級照例核計但各屬冊
報往往參差歧異若必逐一咨查不特輾轉往還有稽時日且各
營或已遣撤或已改調更難查考擬請量爲變通除原營已有帶
兵官弁銜名送到者仍核實辦理外其未送到者卽按各屬冊報
以上下站比對其銜名參差者以最小之品級爲準其多寡不符
者以最少之數爲準毋庸咨取各原營銜名以歸簡易
一兵部奏定章程遣撤東三省察哈爾熱河密雲等處官兵如未
經奏明咨回原處者車輛廩給概不支給惟近年遣撤官兵到境

總以餬口無資紛紛索取並有傷病之人情甚可憫勢難概不應
付且遣撤東三省官兵多有赴兵部請給護牌者州縣尤不能不
照牌應付應請凡遣撤東三省等處官兵如有兵部護牌飭令應
付者無論遣撤時曾否奏明俱准報銷以歸劃一

鹽加耗展限摺

光緒五年八月初一日

奏爲鹽鹽行銷豫岸仍多傷耗請將前加耗鹽展限五年藉資貼補恭摺仰祈

聖鑒事竊長蘆南引各商前因道遠運艱新鹽質嫩傷耗太重奏准於舊定斤兩外每包酌加二十斤暫以五年爲限屆時察勘商力稍紓奏請停止計自同治十三年八月起至本年八月限滿茲據長蘆鹽運使如山詳稱向來生鹽由灘運坨必須存儲一二年鹵氣漸消然後築運約計每年須運生鹽八九十萬包源源接續配運庶鹽抵各岸不致過於虧耗近年旱潦靡常生鹽收成歉薄顆粒尤多散碎鹵氣極重統計上年發運到坨者僅二十萬五千餘包自來運鹽之少未有甚於此者舊存坨鹽築運殆盡本年應築之引勢須趕發新鹽雖鹵氣未乾亦不能不勉強充數豫岸距

津遠者數千里近亦千數百里水陸疊更逐程盤運每包傷耗至數十斤顆粒皆關成本多耗一斤之鹽卽少得一斤之價實屬賠累難支況豫省自災祲以後元氣未復車船腳價昂貴異常加以黃沁賈魯諸河變遷無定道途往往梗阻運費增至數倍現時南引各商不但力未稍紓且困苦較五年以前更甚據誠利生等各商公稟請將前加每包耗鹽二十斤展限五年由該司查明屬實具詳請

奏前來臣維近年旱潦靡常生鹽歉收涵氣極重最易銷耗況豫岸距津遙遠舟車屢易逐程盤剝傷耗實多該司議將南引前加耗鹽展限五年於原定課款並無出入亦尙不至佔礙銷路相應仰懇

天恩俯准照辦以保課本而恤商艱理合恭摺具陳伏乞

皇太后

皇上聖鑒訓示謹

奏

請提湖北新漕摺

光緒五年九月初二日

奏爲直境窪區水災較重前截漕糧不敷分撥懇

恩賞給湖北來歲新漕三萬石提前辦運接濟恭摺仰祈

聖鑒事竊直順各屬夏秋之交雨水過多窪區被淹民情困苦曾於七月初奏蒙

恩旨截撥江北本年河運漕米六萬石以資撫恤其時節候尙早災分輕重本難預定乃七八月間連旬大雨積水未消又添新漲現屆霜降水勢仍復浩漫各屬窪區秋禾無收春麥難種閭閻受患益深續被漫淹多處就已勘報州縣而論其應賑村莊甚眾與七月閒情形不同核計前截漕米六萬石斷不敷用順天府尹臣曾以米少戶多緘商續請加撥竊維直隸地瘠民貧連年水旱困阨已甚今災區較廣一交冬令窮黎餬口維艱必須妥爲撫恤司

庫入不敷出又值蠲豁頻仍無從再籌巨款不得不復作發棠之
請查江浙本年漕糧早已運交通倉來年新漕尙未徵兌惟湖北
省來年仍辦漕糧三萬石由輪船招商局采買運交業准該督撫
臣鈔奏咨行在案上屆因晉賑孔亟經臣等奏請將江鄂新漕提
前辦運甚爲妥速相應仰懇

天恩准將湖北來歲新漕三萬石如數撥給直隸藉應冬撫急需
俾與前截糧石酌量勻撥核實散放以救民命而廣

皇仁如蒙

俞允並請

敕下湖北督撫臣速將購運價腳銀兩照數發交招商局道員葉
廷督唐廷樞等領辦臣卽飭該員等一面領銀一而購米趕於封
河前由輪船運津以資接濟其由津運通船價各款卽令該局按

照上屆晉賑辦法核扣解直稍可津貼賑需理合會同兼管順天府府尹臣萬青黎順天府府尹臣梁肇煌恭摺由驛具陳伏乞

皇太后

皇上聖鑒訓示謹

奏

奏調劉盛藻片

光緒五年九月初二日

再臣駐津籌辦北洋防務在在需人助理查有遇缺題奏按察使劉盛藻統領銘軍轉戰南北十數年剿平髮捻各逆立功最多同治十一年經臣奏派赴陝接統銘營實力整頓繕固邊防和輯兵民其才足以當一面著有明效嗣因調防徐濟軍務稍鬆該臬司籲懇回籍補行終制又經臣於光緒元年四月間奏蒙

俞允現計該臬司早經服闋當時事多艱需才孔亟如劉盛藻之治軍嚴整操行樸實兵事歷練既久吏治亦甚講求洵爲文武兼資不可多得之才合無仰懇

敕下安徽撫臣轉飭該臬司迅速兼程來津由臣酌量委用實於整備海防及地方政務有所裨助理合附片具陳伏乞

聖鑒訓示謹

奏

吳可讀建專祠片

光緒五年九月二十四日

再本年三月

惠陵禮成後隨差行禮司員吏部主事前河南道監察御史吳可讀在薊州馬伸橋三義廟內仰藥自盡道有密摺經順天府尹臣咨送吏部代遞當奉

皇太后懿旨交王大臣等妥議具奏旋復明降

懿旨吳可讀以死建言孤忠可憫著交部照五品官例議卹等因欽此嗣准部咨照例議給廕贈及祭葬卹銀並入祀本籍及死事地方府城昭忠祠各在案茲據薊州知州劉枝彥稟據紳士兵部主事李江等呈稱該故員砥行勵節爲國捐軀讀其遺疏令人忠愛之心油然而生現與眾公議捐建專祠以妥忠魂而勵薄俗稟請具奏前來臣查吳可讀久居郎署曾任言官其學行風節夙爲

海內所推服輒復忠誠鬱發獨進讜言不惜以一死表其志馴至
廷臣集議

懿訓昭垂衷於一是所以爲天下萬世計者至深且遠又聞該員
就義之時遺命卽葬薊州並有出此一步卽非死所等語該州士
民傾心嚮慕願永薦馨香以資觀感禮亦宜之擬請

旨俯准該紳等捐建專祠由地方官春秋致祭以彰

聖世褒忠之典而慰前人景仰之誠謹附片具陳伏乞

聖鑒訓示謹

奏

籌議交收伊犁事宜摺

光緒五年十月初二日

奏爲遵

旨籌議交收伊犁事宜恭摺密陳仰祈

聖鑒事竊臣承准軍機大臣密寄八月二十三日奉

上諭總理各國事務衙門奏籌辦交收伊犁事宜請飭疆臣覆議

一摺據稱連接崇厚電報內稱約章皆定議畫押並將現議條約

十八款摘要知照償費一節尙不過多通商則事多轉趨分界則

弊難枚舉亟宜籌畫布置迅圖補救各等語崇厚出使俄國固以

索還伊犁爲重而界務商務關繫國家大局者自應熟思審處計

出萬全且疊經總理衙門電致崇厚若照來函有礙大局節略內

並言所損已多斷不可行該大臣尤應遵照辦理設法辯論乃竟

任其要求輕率定議殊不可解現在俄約既經議定其第七款中

國接收伊犁後陬爾果斯河西及伊犁山南之帖克斯河歸俄屬
第八款塔城界址擬稍改是照同治三年議定之界又於西境南
境劃去地段不少從此伊犁勢成孤立控守彌難況山南劃去之
地內有通南八城要路兩條關繫回疆全局至第十款於舊約喀
什噶爾庫倫設領事官外增出嘉峪關烏里雅蘇臺科布多哈密
吐魯番烏魯木齊古城七處亦酌設領事第十四款俄商運俄貨
走張家口嘉峪關赴天津漢口過通州西安漢中運土貨回國同
路不特口岸過多並與華商生計亦有妨礙允行則實受其害先
允後翻則曲仍在我自應設法挽回以維全局舊左宗棠金順錫
綸將界務商務各款悉心酌覆李鴻章沈葆楨索額大局除商務
各條詳加籌畫外其界務如何辦理始臻周妥分別詳細密陳等
因欽此仰見

聖謨廣遠思患豫防至周且密欽佩莫名伏查俄人踞守伊犁將近十年每歲收其商農之利數十萬金其平時注意開疆拓土得尺得寸不稍退讓卽迫於公論礙於成約不能不返我故地然彼國上下深謀視爲奇貨稍肆要挾不廢其慾壑不止俄人陰鷙狡詐雖英德等國皆視爲勁敵而憚與其事我出使大臣宜沈毅堅忍置得失榮辱於度外又必統籌全局相機應付以全力與之磋磨乃不至墮其術中中國士大夫風氣向以出使爲畏途平時講習俄事者尤少而此事一出入關繫極鉅往者微臣籌及西事每不免惴惴過慮者誠恐恢復故疆則有名而無實變通商務或受損於無窮也識者初慮俄人浮開兵費俾我力不能償爲久假不歸之計今覈計償銀二百八十餘萬兩尙不甚多俄人之善於操縱而隱肆要求者在此崇厚之受其牢籠而不免遷就者亦在

此不知償費一層中國即多出數百萬金雖竭蹶於一時不至貽患於事後若界務商務則幾微不慎後悔難追在崇厚或因使俄之役以索還伊犁爲重既急欲得地以報

命而他務之利病遂不遑深計誠未免失之輕率謹將議定約章詳加攷覈除其中不甚關輕重者無庸置議外其第四款俄人在伊犁准照舊營業第十款於喀庫二城設領事外准添設嘉峪關等七處領事官第十二款俄國在蒙古天山南北路貿易均不納稅第十三款設領事處及張家口准設棧第十四款俄商運俄貨走張家口嘉峪關赴天津漢口過通州西安漢中運土貨回國同路凡此俄商所沾之利不如是不足慊其意而伊犁亦不肯還然彼此民人雜處則界限仍未分明添設口岸太多則辦理易生枝節其餘奪華商之生計侵官茶之引地在彼獲益不少在我耗損

已多至分界之事第八款塔城界址稍改現尙未知其詳第七款中國接收伊犁後爾果斯河西及伊犁山南之帖克斯河歸俄屬就總理衙門寄到分界圖說覈之伊犁西界割去一條長數百里其患猶淺南界割去一條亦數百里跨踞天山之脊隔我南八城往來要道細揣俄人用意一則哈薩克布魯特游牧諸部新附俄邦今復遮其四境絕彼嚮化之塗一則扼我咽喉使新疆南北聲氣中梗心殊叵測夫中國所以必收伊犁者以其居高臨下足以控制南八城談形勢者謂欲守回疆必先守伊犁也今三面臨敵將成孤注自守方不易圖豈足控制南路想左宗棠等礙難遵辦是界務與商務相較界務尤重矣總理衙門原奏謂收回伊犁尙不如不收回之爲愈洵爲洞見底蘊查同治八年英國新約以彼國未經批准至今不行同治二年葡萄牙使臣來津訂約以爭

論澳門設官一事迄未互換現修俄約既有

批准後通行之語又有西國成例可援原可置而不行且與萬國公法所論亦有相符之處第此次崇厚出使係奉

旨給與全權便宜行事字樣不可謂無立約定議之權若先允後翻其曲在我自古交鄰之道先論曲直曲在我而悔必自招用兵之道亦論曲直曲在我而師必不壯今日中外交涉尤不可不自處於有直無曲之地我既失伊犁而復居不直之名爲各國所訕笑則所失更多且彼仍必以分界修約爲詞時相促迫迫不已必啟兵端而西北路各軍與俄人隔處積不相能約既不換則隨時隨事易生猜嫌亦難保不漸開邊釁中俄接壤之處約萬餘里迨兵衅一開其所要求恐僅照現議而不可得者況防不勝防日本探聽伊犁消息以爲請伸進止若聞俄事不諧或將伺隙而動

卽英德各國修約恐亦因而生心是崇厚所定俄約行之雖有後患若不允行後患更重中國必自度果能始終堅持不至受人擠逼且必自度邊備完固軍餉充裕足資控禦乃可毅然爲之否則躊躇審顧祇能隨宜設法徐圖補救并宜稍示含容免使他國聞之長其效尤之計竊思崇厚電音簡略其定約時如何辨議尙未盡知若使當日明告俄人各事必候

批准後方能舉辦或另有活動之語或別有轉圜之法約計該大臣冬月可以回京應由總理衙門王大臣密與詳詢體察情勢俟換約時能否將界務商務酌議更改如改得一分亦獲一分之益儻實無可改易無可延宕嗣後界務應如何布置諒左宗棠等必就近酌度妥辦至商務補救之方大要有二一曰立法一曰用人查泰西各國彼此商民皆可隨地貿易居住耦俱無猜由其用法

之善中俄舊約原許俄商順便往蒙古各處貿易今既擴充甚多
宜審各處民情地勢俾當事者督同地方官妥議章程由總理衙
門核定畫一暫爲試辦以便籌商經久之道其張家口嘉峪關爲
東西兩路入內地扼要之處尤宜嚴密稽查凡沿途抽換私賣逃
稅等弊分別照約罰辦勿稍含混如果沿途不得銷售包攬則於
無限制之中稍有限制此立法之要也惟是人存則政斯舉徒法
不能治民將來陸路通商益廣交涉益繁更制必益多其安肅道
及張家口監督兩缺宜與海關道員並重新疆各城如郡縣暫難
改設或擇要添設道員遴選洋務人才設法調劑以期辦理妥洽
至各路將軍大臣持節臨邊責任艱鉅必得熟諳時務威惠交孚
乃有裨益似應不拘資格滿漢文武並用以重邊防而資整理此
用人之要也以上兩端或稍可補救於萬一是否有當謹候

聖裁所有遵

旨籌議交收伊犁事宜恭摺由驛密

奏伏乞

皇太后

皇上聖鑒訓示謹

奏

賑糧酌量分撥摺 光緒五年十月初二日

奏爲直順各屬災區賑糧均係核計情形輕重村戶多寡酌量分撥恭摺陳仰祈

聖鑒事竊臣欽奉九月二十五日

寄諭御史鄧慶麟奏順天府屬因災辦賑必須察其戶口多寡被災輕重酌量撥給賑糧方不至於偏枯聞該屬附近州縣均各領米二千石其戶少災輕者固可敷用戶多災重者勢必不敷請飭詳查酌辦等語著李鴻章萬青黎梁肇煌委派妥員會同地方官詳查災區情形據實稟明由該督等酌核辦理等因欽此遵查直順地方本年夏秋多雨窪區被淹奏蒙

恩賞江鄂漕米九萬石卽經分飭各該印委詳細確勘災歉分數開具村名數目據實稟報除無庸賑撫者不計外凡應行賑撫州

縣均係核計災分輕重村數多寡酌撥米糧前已飭據賑局司
道議詳撥給順屬文安大城霸州保定四州縣米二萬石並保定
縣先行撫恤米二千石又撥寶坻縣米一萬石薊州紅糧八千石
武清縣紅糧五千四百五十石香河縣米四千石涿州米二千石
通州米一千二百石又撥給直屬安州米七千石雄縣米一萬石
任邱縣米六千石高陽縣米三千石紅糧四百石安平縣紅糧四
千石深澤縣米一千二百石蠡縣米一千石肅寧縣米一千石由
局備船派員分投運送或令州縣及早領運以免河凍阻滯其水
路不通之處酌量變通折給銀藉省陸運糜費而窮民亦沾實
惠臣又專派遣員顧肇熙等前往文大霸保四州縣督辦查放事
宜此外州縣另由直順遴委委員分往會同該地方官認真確查
戶口均勻核實散放或以工代撫不准絲毫弊混其附近天津災

村俟查明戶口再行酌撥歷屆災賑均係分別查辦從無不論災
分輕重村戶多寡每州縣各給二千石之事鄧慶麟所奏自係未
悉辦理情形除將災歉分數村莊名目蠲緩事宜續行由司核議
專案奏辦外所有直順災區查賑撥米緣由理合會同兼管順天
府府尹臣萬青藜順天府府尹臣梁肇煌恭摺覆奏仰懇
慈廑伏乞

皇太后

皇上聖鑒謹

奏

驗收續購船礮摺

光緒五年十月十六日

奏爲續購英國礮船四隻到津經臣親往驗收恭摺具陳仰祈
聖鑒事竊光緒元年三月內經總理各國事務衙門遣令總稅務
司赫德來津與臣議訂英國阿摩士莊廠二十六噸半礮之船三
十八噸礮之船各二隻專備海防要用該四船先後來華名曰飛
霆掣電龍吼虎威遴選福建船政局學習駕駛之員飭派管帶臣
疊經親加演試大礮準頭較遠輪機精緻足以守護海口制禦鐵
甲兩江膏臣沈葆楨曾經面商分撥臣方以船少未能分派爲慮
接准總理衙門來函亦謂此項船隻無論各海口難資分布卽咽
喉要區根本重地尙恐不敷必須及時添置其時赫德假旋當飭
津海關稅務司德瑾琳由電報轉致赫德與駐英稅務司金登幹
等就近確詢英廠船礮價目有無低昂俟其回信若何再行訂購

業於四年六月十七日附片

奏明在案旋據德瑾琳面呈金登幹電信內稱已與阿摩士莊議照原購三十八噸礮之船每隻船廠機器傢具藥彈一切在內價銀三萬二千五百磅四隻共需銀十三萬英磅合中國關平銀約四十五萬兩等語臣札飭總稅務司轉飭金登幹查照從前辦法與該廠先立詳細合同所有此項船價銀四十五萬兩又由英來華沿途所需經費及購備藥彈等銀十六萬兩卽由各省解到海防經費項下分起照數撥給上年八月十二月內疊據護理總稅務司裴式楷等呈送詳細合同並聲明造船限期過促請展限兩月俟本年五月間由英起程臣又切屬總稅務司轉致該商務須詳細監造勿稍草率俟工竣開駛來華限以九十月間到津聽臣驗收一面飭據福建船政提調道員吳仲翔呈報委派由英學藝

回華之都司劉步蟾等四員一同北上以備分派管駕並准南洋大臣沈葆楨酌擬船名咨會前來伏查此項礮船四隻已據總稅務司赫德飭派江海關稅務司赫政先期馳往廣東迎護駛抵天津海口臣卽於十月初六日親往大沽督同津海關道鄭藻如道員許鈴身暨稅務司德瑾琳赫政等逐細勘驗輪機礮位器具船式均尙精堅靈捷駛出洋面演試大礮藥力加多亦有準頭與前購三十八噸礮船大致相同各船演試後赫德亦自京馳至商催派員接收管帶以便洋員交卸回國惟船政局派出都司劉步蟾等尙未到津現將屆守凍之期洋員未能久待應卽權宜辦理飭令飛鸞等四船管帶官鄧世昌等暫行兼管接收事宜並留原來洋弁三人協同照管操練該四船係接前購四船編爲五、六、七、八等號仍照沈葆楨所擬船名曰鎮北、鎮南、鎮東、鎮西以資號召俟

船政派出各員到津募齊弁勇水手駕駛得人始可酌量分撥除咨行南洋大臣福建船政局飭催劉步蟾等迅速赴津接管再行奏明調撥外所有驗收英國續購礮船緣由理合恭摺具

奏伏乞

皇太后

皇上聖鑒謹

奏

奏留丁汝昌片

光緒五年十月十六日

再記名提督協勇巴圖魯丁汝昌久隨臣軍轉戰南北統帶銘軍
期平粵捻各逆疊著戰功嗣因交卸營務光緒三年秋間給咨赴
部十一月二十一日蒙
召見一次奉

旨發往甘肅差遣復因回籍措資行至天津傷病復發呈請咨部
展限在案臣查該提督丁汝昌幹局英偉忠勇樸實曉暢戎機平
日於兵船紀律尙能虛心考求現在籌辦北洋海防添購礮船到
津督操照料在在需人且水師人才甚少各船管駕由學堂出身
者於西國船學操法固已略知門徑而戰陣實際概未閱歷必得
久經大敵者相與探討砥礪以期日起有功緩急可恃臣不得已
派令丁汝昌赴飛霆等礮船講習一切新到各船會同道員許鈐

身接收該提督頗有領會平日藉與中西各員聯絡研究熟練風
濤臨事或收指臂之助合無仰懇

天恩准將記名提督丁汝昌留於北洋海防差遣以資造就理合
附片陳明伏乞

聖鑒訓示謹

奏

孝子薛有信請旌片

光緒五年十月十六日

再據永平府知府游智開稟稱撫甯縣西石河莊民薛有信純孝性成年甫十四因其父薛純外出多年杳無音問思念不置卽稟明其母出山海關尋覓越四年至江東瑯春東海灣地面始遇其父距家已五千餘里其父雙目失明身爲乞丐狼狽已極隨將己身衣服與父而自服父之敝衣適值隆冬大寒父子困於荒野兩日未曾得食其父受寒骸腫跬步難行堅執欲死有信苦勸肩負而行沿途求乞供父日行十餘里至十九歲回家此咸豐四年以前事也有信孝養備至同治十三年其父病故喪葬盡禮哀毀極誠其母於同治十年患痰症偶思冰食時在六月非都山不能得冰有信遠道步往取以奉母其妻蘇氏冬不著棉襪延姑壽侍奉湯藥歷久不懈光緒三年其母病故夫婦哀毀骨立今有信年四

十四歲應請

旌表等情由縣詳府轉稟前來臣查該孝子醇有信年方童穉卽能遠道尋親備嘗艱苦親存則無慚養志親沒則倍切哀思孝行至誠洵足風世厲俗應請

旨敕部旌表以維風化理合附片具陳伏乞

聖鑒訓示謹

奏

張家口建書院片

光緒五年十月十六日

再據察哈爾協佐領伊勒當阿等會同張家口理事同知誠培萬全縣知縣尹開先稟稱張家口駐防十旗與土著民人戶口繁盛惟讀書之家頗少必須善爲鼓舞經升任福州將軍前察哈爾都統臣穆圖善率同旗漢官員紳民倡勸捐輸置買下堡民房一所於本年四月修造完整名曰掄才書院即自六月起由都統監督及廳縣輪期考課計集捐銀七千七百餘兩除房價二千二百餘兩其餘五千五百兩發商按月一分生息每年計得息銀六百六十兩作爲院長束脩生童膏火雜用此項本利無論地方何事不准挪動又修造工料置買書籍什物等項計用銀一千六百餘兩月行籌補至書院尙有餘房每年可得租錢一百千又於壩工項下每年撥歸書院地租錢一百千共二百千除書院歲修及添補

經門外每屆三年核計餘錢若干卽作爲諸生鄉試盤費議具規
條稟請會奏立案前來臣查張家口地處邊隅素鮮力學之士其
有志上進者亦苦於無可觀摩今旗漢聯爲一體捐建書院洵屬
地方善舉足以振起人才除會飭該十旗協佐領及地方廳縣督
率紳董永遠認真經理外理合會同福州將軍前察哈爾都統臣
穆圖善察哈爾都統臣景豐附片具陳伏乞

聖鑒敕部立案謹
奏

籌議購船選將

光緒五年十月二十八日

奏爲彙奉

寄諭先將海防購船選將各節切實籌議密摺陳仰祈

聖鑒事竊臣欽奉光緒五年九月三十日

密諭前據恭親王等面奏疊經總理衙門面商南北洋大臣豫籌海防事宜尙未定議此事關係極重斷不宜再事遷延著李鴻章沈葆楨卽將海防事宜並王先謙所陳備船械一條切實籌議先行具奏期於事在必行等因欽此又奉十月二十四日

密諭丁日昌遵議擬奏各摺片現議整頓輪船水師自非擇將帥精器械不可西人熟習輪船操練若能延致才技精通者爲教練當可日有起色應如何設法訪訂之處著李鴻章沈葆楨與出使各國大臣面商辦理至學堂練船出洋諸舉皆爲豫儲將才尤當

擴充精選以備異日之用鐵甲蚊子等船爲海防所不可少鐵甲
船所費過鉅一時尙難籌辦蚊子船現已先後購到八號著卽督
飭管帶之員認真演練毋得有名無實以後如何陸續添購並購
船及續延教練西人可否令赫德及出使大臣分辦之處著李鴻
章沈葆楨一併籌商妥辦等因欽此並先後鈔錄原摺給閱前來
仰見

聖主綢繆未雨指示周詳曷勝欽服伏查自光緒元年四月間奉
旨籌辦海防其時海口一無豫備赤地新立只能擇要爲之督飭
各營於大沽北塘新城各處仿照洋式修築礮臺營壘並與總理
衙門面商令總稅務司赫德在英廠先後訂購大礮蚊子船八隻
水陸相依稍壯聲勢徒以戶部指撥海防經費各省關未能照數
報解又厯經抵撥西征軍餉分提晉豫賑款仰力以抽分而愈薄

船械雖欲備而難齊夫軍事未有不能戰而能守者況南北洋濱海數千里口岸叢雜勢不能處處設防非購置鐵甲等船練成數軍決勝海上不足臻以戰爲守之妙查西洋兵船利於海面攻取者約有三種一鐵甲船形式大小不等鐵甲厚薄不等船首衝鋒有無不等一快船或配鐵木或用鋼壳專取行駛快速能追擊敵船而爲敵船所不及一水雷船喫水雖淺或帶在大船上或隱於大船後衝擊最宜至於木壳輪船如閩滬各廠所製者皆西洋舊式只可作無事時巡防有事時載兵運糧之用實不宜於洋面交仗蚊子船則爲守港利器如赫德所購者礮位較大在淺水處亦能轟壞鐵甲也中國卽不爲窮兵海外之計但期戰守可恃藩籬可固亦必有鐵甲船數隻游弋大洋始足以遮護南北各口而建威銷萌爲

國家立不拔之基乃議之五六年而迄無成者一由經費太絀一由議論不齊一由將才太少然欲求自強仍非破除成見定購鐵甲不可臣先因北洋經費尙有存款百萬欲購一鐵甲船暫行試練俟駕駛得人操演既熟集有巨款再行續購推廣分布曾緘屬駐德使臣李鳳苞在英法各廠訪求新式旋接總理衙門公函以專顧一口爲疑而李鳳苞八月間來信亦謂近日各國議停造鐵甲如可緩辦尤爲合算且既有鐵甲應同時並舉四事一爲礮臺庇護一爲船塢修理其尤要者一爲快船若鐵甲無快船輔佐則孤注而已一爲水雷有行雷可以出奇有伏雷可以堵守而後鐵甲不爲快船所困等語自係在洋博訪羣議斟酌時勢以立言適新購蚊船到津赫德自京來晤臣與密商辦法該總稅司亦以先購快船再辦鐵甲爲是遂齎呈英版寄來新式快船兼碰船圖式

再三考究令其譯出節略內稱船長二百英尺寬三十英尺喫水十五英尺每半時行十五海里新式機器首尾各置二十五噸大礮一尊左右各新礮數尊並帶水雷小輪船一隻船頭水綫下暗設堅固衝鋒可碰敵船若訂兩隻需銀六十五萬兩後年夏閒工成來華據云可保追趕碰壞極好之鐵甲船臣復諮詢駐津之法國水師兵官近來西洋鐵木船新式船頭多設衝鋒以備戰時添一碰船之力此項快船既載大礮又有衝鋒行駛果如此迅速實屬合用蓋鐵甲船及平常兵船每半時僅行十一二海里此則十五海里進退自裕如矣臣面商總理衙門謂宜籌款及時購辦因屬赫德先由電報轉飭駐英稅司金登幹與該廠訂辦趕速動工其價銀分三期兌付約於光緒七年春夏到華一面酌飭總稅務司備案應俟此二船到後再行酌商分撥惟是快船兼碰船稍可

出洋操巡應敵究嫌氣力尙單如果各省關儘力解濟南北洋經費略有積存必再添購鐵甲船配以快船及現有木船蚊船方可成全軍而厚兵勢雖未可一蹴幾實未可一朝忘臣仍密商李鳳苞等悉心采訪如各國鐵甲並未罷議當擇其與中國海面相宜者酌量訂購隨時奏明請

旨辦理至現在購到蚊船八隻來春弁勇配齊擬飭調龍驤虎威飛霆掣電四船赴南洋歸沈葆楨調遣卽留鎮北鎮南鎮東鎮西四船在津沽由臣督飭道員許鈴身提督丁汝昌會督管帶各員認真操練並令時常出洋赴東奉交界之大連灣及沿海口岸駐泊梭巡以壯聲威丁日昌摺內所陳延請洋官教練一節確有見地現統帶蚊船來華之英國副將名郎者係赫德等向其水師兵部借用英提督古德及出使大臣曾紀澤皆稱其能臣接晤數次

調閱操演尙爲勤幹明練尙留效用該員云須回英乞假准行乃
可復來臣又面商曾紀澤與其兵部議訂赫德則謂郎副將如不
復至伊可月薦安人現管帶鎮北之都司劉步蟾在英國學堂兵
船肄習五年深知機要其材器頗堪造就若再得精嫻理法之西
人與爲切磋可備將來統帶快船鐵甲之選目下帶船將才固少
卽管輪機管礮之弁駕船之水手皆須逐漸陶鑄西國以學堂練
船爲根基故人才輩出明年臣擬另設練船一隻遴派幹員選舉
非省丁壯素習風濤者上船練習庶異日快船至而弁勇不必盡
資於閩亦因地制宜之方福建船政本有仿造快船之說與其多
造而船不得用不若少造而船必求精若仍照舊式恐無實濟其
學堂練船規模頗合西法應請
敕下船政大臣設法整頓籌辦逐漸圖功又蚊子船防守海岸最

爲得力赫德所購尤各國罕有之新式價目稍昂而功用自別中國各局目前實不能仿造臣愚以爲廣東臺灣海口至少須各有二隻浙江甯波山東煙臺海口至少須各有一隻平時與南北洋現有蚊船互調會操有事則各防各口藉杜窺伺每隻約需銀十五萬兩在各該省力所能辦兩廣督臣奏稱擬先購置一二自必籌有的款臣面詢升任江甯藩司前署福建藩司盧士杰據稱閩省藩運各庫尙積存數十萬又詢前任浙江藩司任道鎔謂浙力十餘萬尙可籌湊山東各庫另存銀百餘萬則遠近皆知擬請敕下各該督撫臣先其所急速照議籌辦不准藉詞諉延並截留海防協款徑請總理衙門轉飭赫德剋期定購明年秋冬卽可來華其隸南洋者由沈葆楨會商調度隸北洋者由臣會商調度庶眾擎易舉聲勢相聯必於海防全局有裨除王先謙丁日昌摺

內所陳各條容再詳晰籌議具覆外所有籌辦海防購船選將各節先行覆陳各緣由謹繕摺由驛密陳是否有當伏乞

皇太后

皇上聖鑒訓示施行謹

奏

請催海防經費片 光緒五年十月二十八日

再臣遵

旨籌備海防現議定購快船兼礮船約期兌價並擬添購鐵甲船及采辦鎗礮水雷船各件雇用洋官教練及收船弁勇口糧一切需費浩繁全指各省關奉撥釐金洋稅應用查戶部原撥南北洋海防經費每年額款銀四百萬兩自光緒元年七月起至三年六月止統解北洋自三年七月起分解南北洋各半內除江蘇廣東福建三省釐金每年合撥一百萬兩絲毫未解均經各該省自行留用外其浙江江西湖北三省釐金每年亦合撥一百萬兩元二兩年報解雖未盡如數尙形踴躍三年以後報解更稀約計該省各欠解銀五六十萬不等在

朝廷屢飭籌辦海防此事關係重大臣等何敢玩視而餉不應手

斷難爲無米之炊曰下

萬年吉地及

惠陵工程告成緊要撥款稍減各省財力稍紓應請

旨嚴催浙江江西湖北督撫臣將奉撥釐金額款趕緊設法如數

太批籌解以應急需至各海關撥定四成洋稅歷經抵撥西征軍

餉其分解南北海防已不及半若再有意延欠必至貽誤事機並

請

敕下閩海粵海江海浙海關各監督按結如數迅速分解儻再稍
有挪延卽由臣等指名嚴參理合會同南洋大臣兩江督臣沈葆

楨附片陳請伏乞

聖鑒訓示謹

奏

武弁回華教練摺

光緒五年十月二十八日

奏爲派往德國軍營學習兵法技藝武弁期滿陸續回華現籌分撥親軍哨隊教練恭摺具陳仰祈

聖鑒事竊光緒二年三月間教練礮隊德國人李勛協期滿回國經臣在於海防各營內遴選年力少壯之游擊卞長勝等七弁商令李勛協帶赴該國武學院講習陸軍技藝俟學成回華再分撥各營教練以期漸開風氣當經議定章程三年爲期每撥經費飭令由津起行附片具

奏奉

旨著照所請該衙門知道欽此旋以下長勝等赴德學藝未派監督適道員李鳳苞監督福建船政局學生赴英法學習駕駛製造各事復經飭令李鳳苞按三箇月一次由輪車馳赴德國兼查下

長勝等功謀並請總理衙門照會德國駐京公使知照於二年十一月選派閩廠學生出洋學習摺內

奏明在案計自卞長勝等奉派赴德卽由駐京德國使臣巴蘭德之兄子告提督巴蘭德商明該國兵部派入斯邦道第四營交哨官德羅他妥爲安插增給經費延師指授旋因卞長勝王得勝朱耀彩三弁氣體稍弱改派博洪廠習藝三年春調赴維廉士哈芬海口學習水師復調漢耳海口四年春因卞長勝朱耀彩性情較浮學業未能精進先調回華楊德明查連標袁雨春劉芳圃四弁仍在斯邦道步隊營內歷經巴蘭德及德羅他妥爲照料視同子弟每歲由該軍總統帶赴王宮宴會第一年先習練手足及演鎗各法兼習德語第二年隨看林操所演迎敵設伏及繪地圖排演各法第三年習演帶排隨同林操兼習文書上年十月另延哨官

西鐸教授布陣各法該弁等漸有會心今春三年期滿經臣緘商

駐德使臣李鳳苞暫展限期令該弁等詳考一哨調度各法以窺

步隊之窾要自夏徂秋該弁等盡則隨操晚則聽講凡鎗隊理法

皆能領悟六七月間又各備馬匹隨同礮隊大操以觀配搭步隊

相濟爲用之妙大操旣畢新兵換防無藝可學除王得勝一弁仍

留柏林都城延師專教楊德明一弁攻苦成疾暫在斯邦道就醫

外其查連標袁雨春劉芳圃三弁由李鳳苞咨送回華據稱德國

陸軍甲於天下而步隊尤精於馬礮各隊其得力全在每日林操

熟演料敵應變之法每年夏秋大操熟演露宿野戰攻守之法其

法備於一哨擴而充之可營可軍該弁等隨閱林操大操耳濡目

染最爲親切惟德國兵官向例皆選世家子弟聰穎者入武學院

讀書三五年考取中式入營學習或步或馬或礮仍不能兼今查

連標等洋文既未盡習強記力學三年有餘雖未能遽臻彼中兵
官之詣而較之教練洋員固已有過無不及該弁等向習步隊頗
已完備彼國每以泛濫爲戒自應咨送回華以免閒曠等語上復
面加考驗該三弁所習步隊技藝紀律尙爲嫻熟出洋肄業日久
艱苦備嘗學有心得據李鳳苞咨稱該弁等在洋均各謹守禮法
見重於外人營哨教習均具考語信憑是其材器頗堪造就擬懇
天恩將藍翎守備銜儘先千總袁雨春留於直隸以守備儘先補
用並

賞換花翎軍功查連標劉芳圃二弁均

賞給五品藍翎留於直隸以千總儘先補用以示優獎而資傳習
臣維中西用兵之法大略相同惟中國選將必臨敵而後得西國
選將以學堂爲根基中國軍械不求甚精操練不必甚嚴西國則

一以精嚴爲主取彼之長救我之短不妨參觀互證期有進益現擬於親軍營內先行挑選哨隊仿照德國一哨之制交該弁等依法教練並令新募德國兵官漢納根隨時察看督率講究日後將學成者分派各營充當教練漸次擴充成效必多於海防不無裨助除咨明總理衙門外所有派往德國學習兵法技藝武弁期滿陸納回華緣由理合恭摺具

奏伏乞

皇太后

皇上聖鑒訓示謹

奏

德國兵官請給寶星片

光緒五年十月二十八日

再臣疊准李鳳苞咨稱查連標等赴德肄業先經駐京德國使臣巴蘭德之兄予告提督巴蘭德轉託斯邦道提督及營哨教習現在期滿學成回華接准該提督巴蘭德而稱斯邦道教隊出力之步隊親軍第一營三等提督官波蘭撒爾第四營頭等總兵官薩呢則第四營內頭哨二等總兵官哈克威擬懇邀請

奏獎由駐京使臣巴蘭德轉遞前來臣查光緒三年十月及本年八月德國兵官德羅他與提督巴蘭德或教練盡心或照料周妥經臣先後奏奉

俞旨賞給寶星欽遵各在案今該兵官等三員教隊出力事同一律既據巴蘭德函懇給獎自應由臣飭局仿造二等金寶星一面發給該提督官波蘭撒爾並造三等金寶星二面分給該總兵官

薩呢則哈克威配帶均交駐津德國領事傳

旨賞給以酬勞勩除咨請總理衙門照會巴蘭德知照外附片陳
明伏乞

聖鑒訓示謹

奏

東明月隄工費摺

光緒五年十月二十八日

奏爲東明黃河南岸隄裏加築月隄用過銀數工段丈尺照案開
單奏報仰祈

聖鑒事竊直隸東明縣境黃河南岸地勢低下隄防喫重又因東
省北岸臨河築隄佔礙水道大溜遂更南注今年伏秋汛內黃水
疊次盛漲偏刷隄根其黃莊岳辛莊一段坐灣頂衝尤極危險據
大名鎮徐道奎大順廣道黃槐森開州協副將張桂芳察勘商酌
應於該段隄裏圍築月隄一道長一千二百餘丈仍責令員弁固
守原隄竭力搶護儼衝塌過甚萬難抵禦則兼守月隄以資保衛
約需銀九千餘兩飭由練餉局江南協餉天津支應局貨釐各項
下分別勻籌撥給於七月二十四日集夫興工業經專摺
奏報在案旋據該鎮道等稟稱此係片案工程應雇民夫趕築且

時當大汛練軍駐守原隄晝夜搶險亦不能兼辦月隄惟經費支絀仍須格外節省遂酌調巡緝地面練軍九哨前往幫同工作除民夫均給工價外練軍僅給犒賞不開工價其月隄基址因避民間墳墓量爲縮短實計築長一千一百二十餘丈於八月二十九日工竣該鎮道等逐段量驗相符存積一律堅實統共用銀八千一百二十餘兩較原議銀九千餘兩計省一千餘兩開具用過銀數工段丈尺具報前來臣查此次圍築月隄係因大溜偏刷隄根恐原隄繼續潰竄兼守今原隄力搶平穩而有此月隄將來防守可較得力殊於汛務有裨至月隄工程本係臨時勘辦就地雇用民夫添調練軍認真堅築非尋常例辦工程可比與前築南隄情事相同所用民夫工價棚蓆器具及練軍犒賞等項並無絲毫浮冒自應循照歷次奏准成案開單奏報無庸另造冊結以昭核實

理合開單恭摺具陳伏乞

皇太后

皇上聖鑒敕部知照謹

奏

謹將東明黃河南岸隄裏圈築月隄銀數工段丈尺開具清單恭呈

御覽

計開

一、圈築月隄一道計長一千一百二十三丈六尺七寸五分頂寬二丈底寬七丈高一丈計用民夫工價銀六千九百五十九兩四錢八分

又棚席器具銀七百二十兩

又練軍九哨犒賞銀四百五十兩

統共用銀八千一百二十九兩四錢八分內於練餉局江南協餉項下撥給銀五千兩天津文應局釐捐項下撥給銀三千一百二十九兩四錢八分合併聲明

鹽引推展摺

光緒五年十一月十五日

奏爲長蘆原停引日現在實難遞增仍請照案推展五年藉紓商困恭摺仰祈

聖鑒事竊臣前因蘆綱連年災歉引岸滯銷請將原停引目十萬道照案展限五年旋准戶部議覆應照山東成案按年遞增二萬道期以五年復額等因當經轉飭遵照茲據運司如山詳稱此項停引十萬道始自道光二十三年嗣因頻年疫滯積引難疏疊經推展計已歷三十餘年之久溯查三十餘年以前直豫未遭賊擾未遇大荒人民較眾各處河道暢順鹽包一水可通運費較省各商交款並無樂工加價軍需復價彌補賑款諸名目帑利亦不由眾商攤交課帑較減又未經清查鹽務加重斤兩每包約輕數十斤銷引較易有此四利而每年尙必須停引十萬道且於停引之

外每年仍滯銷十餘萬道可見蘆鹽只銷此數不能勉強增益也
今鹽包既重課帑既增運費既鉅加以疊被兵燹水旱凡受災較
重之區戶口彫殘十去其五而欲舉三十餘年以前久停之引規
復於今則其窒礙難行情形不待詳言而知矣查停引之外每年
尙應銷引六十餘萬道近來出庫之引多寡牽算每年僅止四十
餘萬道而此四十餘萬引之鹽並不能全數銷售祇以課帑緊要
無論已售未售不得不令商人一律完交其未出庫之二十餘萬
道亦須商人包賠課帑隨商力盡筋疲日見蕭索實由於此山東
雖增請部引其實隻引未銷尤難援以爲例擬仍請展限五年庶
免滯引愈多商累愈重參懸相繼等情具詳前來臣維目下時艱
帑絀方擬開源節流以濟要用鹽課乃固有之利能增一引卽多
一分入款敢不竭力整頓豈容稍涉因循無如蘆綱連遭災歉疲

累太深每年多寡牽算僅出庫引四十餘萬道積滯引二十餘萬道且光緒三四兩年大災竟積引至八十餘萬道尤爲向來所未有舊引既難疏通新引奚從增益若徒鰲增引虛名不求收課實際於事何裨若再令增賠課帑則商累不支有礙全綱大局實未敢遷就定議該運司所詳確係實在情形相應仰懇

天恩仍准將原停引目十萬道自光緒五年起照案推展五年俟限滿察看情形再議分限帶運藉紓商困理合恭摺具陳伏乞

皇太后

皇上聖鑒訓示謹

奏

湖北京餉衝失摺

光緒五年十一月十五日

奏爲湖北京餉行至直豫交界之漳河猝被衝失十一鞘遵

旨派員會勘明確照例擬請免賠恭摺仰祈

聖鑒事竊湖北委員候補知府瞿廷韶管解京餉銀十七萬餘兩計裝一百七十一鞘於本年六月二十五日由河南安陽縣護解前進未刻抵直豫交界之漳河過渡詎渡至北面河灘上游山水陡發致衝失十一鞘計銀一萬一千兩當經嚴飭各員打撈刨挖並由直豫兩省各將情形奏報奉

旨派員會同勘辦確切查明等因欽此臣鴻章遵派候補知府盧應楷臣宗瀛遵派候補知府薛成榮前往據勘漳河南屬安陽北屬磁州安陽豐樂鎮村北磁州講武城村南各立界碑其界碑之闊大溜忽南忽北河身遷徙無定水落歸槽寬約一二里無溜處

現出沙灘水漲時則一片汪洋寬至七八里六月二十五日安陽
遞送湖北餉鞘過河其時河流南趨緊靠豐樂鎮渡過中流起行
河灘不期上游山水陡至河灘忽成大溜致未後餉鞘猝被衝失
迨秋閒河流北徙失鞘處所反在河流之南向來北往各差由磁
州送至南岸交接南來各差由安陽送至北岸交接除豐樂鎮村
北講武城村南各立界碑外其閒河身甚寬水流無定向不能再
於沙灘中分疆畫界此次失鞘處所在豐樂鎮界碑之北講武城
界碑之南相隔界碑尙遠卽屬忽漲忽落之河灘在磁州則已渡
而未經接收在安陽則過河而尙未交替適值未交未接之際突
遇河水漲發大溜奔騰致遭衝失實爲變生不測人力難施等情
繪具圖說會稟前來臣等查核所稟係屬實在情形旣稱衝失餉
鞘尙在未交未接之際自應照此定議前已疊飭各該員不惜重

資多雇夫役設法搜淘並打造丈餘鐵簍於沙灘中逐段簍探乃
河寬沙厚自六月刨挖至今並無銀兩蹤跡緣漳河源發山西樂
平長子等縣晉豫各境附近諸水節節會歸其流甚巨怒濤駭浪
勢極洶湧大溜趨向無定頃刻之間或河變爲灘或灘變爲河而
沙底又復有水往往刨挖喫緊之際山水陡至不能駐足過後挖
至三四尺沙底之水上湧沙卽下陷尤難著手據該員等稟經行
司議請免其參賠伏查定例起運官物若船行猝遇風浪及外人
失火延燒或盜賊劫奪事出不測而有損失申告官司委勘明白
免罪不賠今湖北餉銀一百七十一鞘行至直豫交界之漳河其
時天色晴明河流平靜因卽過河尙非運解不慎詎上游山水陡
發頃刻大溜湧至以致末後兩車二十鞘隨溜衝去實係事出不
測車行河灘猝遇大溜與船行遇風情無二致且較外火延燒盜

賊劫奪更難防禦漳河係歷來著名大河巨險盛漲驟至人力難施非尋常內河可比實與大江外海險阻相同當河水猝發時餉車皆已被浸稍或遲緩勢將全衝各該員趕緊竭力護救是以前起各車一百五十一鞘一律挽登高岸末後衝去兩車二十鞘又卽設法搶護九鞘尙知愧奮其餘已失十一鞘計銀一萬一千兩撈挖四月餘之久勞費已多委因河寬水急隨流而下無從撈尋情殊可原旣經兩省委勘明白擬懇

天恩俯准照例免其參賠以示體恤至該州縣界碑之間旣因河流無定不能再於沙灘分界嗣後北往各差應令磁州送至安陽界碑處所交接南來各差應令安陽送至磁州界碑處所交接各專責成謹合詞恭摺陳伏乞

皇太后

皇上聖訓示謹
奏

議擬中外洋務條陳摺

光緒五年十一月二十六日

奏爲疊奏

寄諭分別籌議恭摺密陳仰祈

聖鑒事竊臣欽奉光緒五年六月初七日

上諭都察院奏代遞貴州候補道羅應旒敬呈管見一摺所有整
學校以新吏治練兵民之武技以自強精機氣之器械以利用參
西國之法例以謀遠握朝野之利權以儲費各條有無可采著李
鴻章沈葆楨體察情形悉心妥籌具奏等因欽此又奉九月三十

日密諭翰林院侍讀王先謙奏條陳洋務事宜一摺所奏審敵情振
士氣籌經費備船械各節不無可采著李鴻章沈葆楨卽將海防
事宜並該侍讀所陳備船械一條切實籌議先行具奏王先謙所

稱任將擇使二事亦爲儲才起見李鴻章等如有所知著隨時密行陳奏以備錄用此外各條是否可行並著分別妥議具奏等因又奉十月二十四日

密諭丁日昌遵議覆奏各摺片不無可采現議整頓輪船水師自非擇將帥精器械不可西人熟習輪船操練應如何設法訪訂之處著李鴻章沈葆楨與出使各國大臣面商辦理至學堂練船出洋諸舉皆爲豫儲將才之計尤當擴充精選以備異日之用丁日昌片內所奏各節除減額兵停武科二事均無庸議外所稱擴充礦務裁撤水師及凡非極要處所祇須防以水雷暫可停造礮臺並裁汰腹地勇營著李鴻章沈葆楨妥議具奏至所奏稍寬釐稅以杜洋票一節於餉項有無裨益著一併籌議具奏等因欽此並先後鈔錄原摺給閱前來仰見

聖主虛衷聽納博訪周諮曷勝欽服臣於十月二十七日業將海防購船選將各節切實籌議密摺覆陳此與丁日昌之所謂擇將帥精器械王先謙之所謂振士氣備船械大致尙不甚歧異現可無庸贅論伏思近來時事多艱

朝廷深恩遠慮廣開言路內外臣工得以抒其蘊蓄暢所欲言嘉謨異策原可輻湊並進惟是言者之精粗深淺既有不同卽所言甚當或礙於成例或阻於浮言或絀於經費或乏於人才往往難見諸施行而凡一事之利弊又非確有見聞難遽懸斷其事之關涉他省者尤非南北洋大臣權力所能及耳目所能周往返行查迹近推宕茲臣謹將確鑿可行者籌定一二其於事理稍疏與格於時勢暫宜緩行者不復置議以附實事求是之義卽如礦務一節丁日昌王先謙羅應旒皆言之今直隸之開平湖北之當陽安

徽之貴池空灣之雞籠均已試辦莫有數處稍著成效即可逐漸擴充洋藥酌加稅釐與機器製造輪船招商各節王先謙羅應旒皆言之除洋藥釐稅並徵應由總理衙門與英使威妥瑪商辦外其織造機器已創辦於蘭州輪船攬載已設局於津滬各埠招商借款目下辦法原不出此若辦理自有起色商情自更踴躍官本亦較易籌要之此數端者仰賴

朝廷主持於上臣等乃得審度機宜妥爲經營既須臨事變通尙難豫設成法又望各省大吏意見相同呼應無甚隔閡各處輿情歷練既久賢才因之奮興則風氣漸開富强之基可立矣至羅應旒之條議如兼課西學以資實用鼓勵巧工以新製造獎勵巨商以握利權均可節取而酌行之將來遇有此等事件應由臣等隨時請

旨核辦王先謙之條議以日本併吞琉球藐視中國意在整軍經
武大張聲代籌彼強鄰斯事關係較重必深籌乎彼此進退之機
宜熟審乎本末輕重之分數日本國小財匱其勢原遜於泰西諸
國惟該國近來取法西人於練兵製器各務刻意講求頗有振興
之象中國水師尚未齊備餉需亦未充足若彼不再肆鴟張似仍
以按約理論爲穩著但倭人性情桀驁設令狡焉思逞亦不可無
以待之中國自強之圖誠難一日稍緩矣他如聖崗荒田嚴汰冗
員整頓釐權皆各省應辦之政擇使一事亦係要務俟有所知隨
時密陳以備錄用至丁日昌之條議洞晰中外情勢多閱歷有得
之言與空談無實者不同所議購船及延西人教練一節山東浙
江及閩粵各省均須暫備蚊船奉

信飭臣代爲經理俟各該省籌款解到或仍交赫德承辦以資熟

手若購辦鐵甲船經費果能湊齊應面商出使大臣李鳳苞等設
法訪購其續延教練西人亦請留紀澤李鳳苞等就近物色必須
專門名家才能出眾而又恪聽調度者始敢決計延訂赫德如有
所知苟係上品亦可招用但中西教法不同上等人材肯來中國
者頗少祇能懸其格尙難遽得其人也海口非極要處所防以水
雷即可停造礮臺旣節糜費又示敵以不測甚爲合算惟水雷事
理頗奧各省真能講求者頗少釐稅宜稍崇寬大以廣招徠是在
多選廉平之員專司樞務必於餉項有裨至腹地勇營及沿海紅
單艇船之類原可酌量裁撤惟各省地勢遼闊伏莽尙多非有得
力防營不足以資控制艇船弁兵額餉較輪船勇餉爲儉閒能捕
盜於淺水之處以輔輪船所不逮恐亦未可盡裁應請
敕下各省督撫參酌時宜認真淘汰凡艇船之旒敗無用者勇營

之虛弱不得力者量加裁撤既昭核實又不至偏廢斯爲近之抑
臣更有陳者邇來各國環伺外侮交加未雨綢繆正在今日閭
日昌之議令人憂危之意悚然而生儲蒙

聖主堅持定見激勵人材勿爲浮議所搖勿爲常例所格內外臣
工同心戮力以圖自治自強之要則敵國外患未必非中國振興
之資是在一轉移閒而已所有疊奉

寄諭分別籌議緣由恭摺由驛密陳伏乞

皇太后

皇上聖鑒訓示謹

奏

南紳會辦工撫片

光緒五年十二月十九日

再直境上年旱荒賑需不繼幸賴南省紳富士商出貲出力竭誠
濟助經臣疊次奏報在案今年又遭水災窪區多被淹浸該紳等
仍力籌援救江蘇廩生嚴作霖候選州同楊培等以山西民困漸
蘇將賑督捐款餘銀六萬三千兩於十月間攜帶來直親赴任邱
等處查戶散放並由江浙閩廣紳士承辦上海協賑公所匯寄銀
三萬五千兩棉衣一萬數千件分撥災區接濟冬賑查南省紳商
素多急公赴義上年直豫晉三省災區疊籌巨款分濟亦經各省
奏報在案南省兵燹之餘元氣未復並非家有餘力人有餘貲惟
其樂善性成甚至貧士捐膏火婦女脫簪珥百工減餉貲積微成
鉅以救鄰災其承辦各紳則皆苦口苦心多方勸集嚴作霖楊培
與候選知府李金鏞等連年分赴海流及直東豫晉查辦賑務徧

歷災村撫問疾苦處處認真著實爲窮黎全活性命爲

國家宣布恩德其有裨於人心風俗者非淺今又於嚴寒風雪中
救濟直境災民視人猶己況瘁不辭深堪嘉尙惟窪區積潦尙未
消涸冬賑雖可敷衍春撫亟應預籌該災民頻經水旱力盡筋疲
現在災重地方惟食糠粃草具情形甚爲悽慘來春謀生乏術必
須妥籌撫卹統計二十餘州縣戶口極繁又有應修隄河工程一
無指項臣復諄飭各紳設法籌勸以資補苴一面仍調李金鏞來
直會督官紳辦理工撫期歸安實將來事竣擬擇其尤爲出力者
酌請獎敘並將捐戶按部定章程請給虛銜

封典以昭激勸理合附片具陳伏乞

聖鑒敕部知照謹

奏

李文忠公奏稿卷二十五